

Na osnovu člana 10. stav 4. tačka d. Zakona o poštama Bosne i Hercegovine ("Službeni glasnik BiH", broj 33/05), Vijeće Agencije za poštanski promet Bosne i Hercegovine Sarajevo, na sjednici održanoj dana, 5. juna 2007. godine, usvojilo je

## **STATUT**

### **AGENCIJE ZA POŠTANSKI PROMET BOSNE I HERCEGOVINE**

#### **POGLAVLJE I. OSNOVNE ODREDBE**

##### **Član 1.**

##### **(Predmet Statuta)**

Ovim Statutom se uređuju nadležnosti i organizacija Agencije za poštanski promet Bosne i Hercegovine (u daljnjem tekstu: Agencija), njen način rada i finansiranje, zaštita povjerljivih informacija, kao i druga pitanja značajna za obavljanje poslova i rad Agencije.

##### **Član 2.**

##### **(Osnovni podaci)**

- (1) Agencija je osnovana Zakonom o poštama Bosne i Hercegovine ("Službeni glasnik BiH", broj 33/05, u daljnjem tekstu: Zakon).
- (2) Naziv Agencije je: Agencija za poštanski promet Bosne i Hercegovine.
- (3) Naziv Agencije na engleskom jeziku je: The Agency for postal traffic of Bosnia and Herzegovina.
- (4) Sjedište Agencije je u Sarajevu.
- (5) Agencija ima status pravnog lica sa pravima, obavezama i nadležnostima definiranim Zakonom i ovim Statutom.

##### **Član 3.**

##### **(Pečat i štambilj)**

- (1) Agencija ima pečat okruglog oblika prečnika 50 mm i 30 mm.
- (2) Pečat u koncentričnim krugovima sadrži latiničnim pismom ispisan tekst: "Bosna i Hercegovina Agencija za poštanski promet Bosne i Hercegovine Sarajevo" i ćirilničnim pismom ispisan tekst: "Босна и Херцеговина Агенција за поштански саобраћај Босне и Херцеговине Сарајево". U sredini pečata nalazi se grb Bosne i Hercegovine.
- (3) Agencija ima štambilj koji služi za kancelarijsko poslovanje.
- (4) Način korištenja, čuvanja i zaštite pečata i štambilja regulisat će se aktom Agencije, u skladu sa Zakonom o pečatima u institucijama Bosne i Hercegovine.
- (5) Agencija ima žiro račun.

## POGLAVLJE II. NADLEŽNOST AGENCIJE

### Član 4.

#### **(Nadležnosti Agencije)**

- (1) Agencija obavlja poslove iz oblasti svoje nadležnosti utvrđene Zakonom.
- (2) Agencija obavlja svoje poslove samostalno, u skladu sa zakonom i drugim propisima.
- (3) Agencija je nadležna za obavljanje poslova koji obuhvataju:
  - a) regulatorne funkcije u oblasti poštanskog prometa,
  - b) donošenje pravila,
  - c) izdavanje licenci,
  - d) čuvanje podataka,
  - e) nadgledanje i razvoj tržišta poštanskog prometa,
  - f) nadzor nad operaterima poštanskog prometa,
  - g) saradnju sa domaćim i inostranim organizacijama i institucijama vezanim za poštanski promet.

### Član 5.

#### **(Samostalnost u radu Agencije)**

Za obavljanje poslova iz člana 10. stav (5). alineje b), g), j), i l) Zakona, Agencija traži saglasnost Ministarstva komunikacija i prometa BiH.

## POGLAVLJE III. RUKOVOĐENJE I UPRAVLJANJE AGENCIJOM

### Član 6.

#### **(Vijeće Agencije)**

- (1) Vijeće Agencije rukovodi radom Agencije i obavlja poslove i zadatke iz nadležnosti Agencije.
- (2) Vijeće Agencije se sastoji od tri člana koje imenuje Vijeće ministara Bosne i Hercegovine u skladu sa Zakonom.
- (3) Član Vijeća Agencije je obavezan obavljati svoju funkciju savjesno i održavati integritet Agencije.
- (4) Član Vijeća Agencije ne smije koristiti svoj rad u Agenciji, niti integritet Agencije za ostvarivanje ličnih ili drugih ciljeva koji su u suprotnosti sa zakonom i Etičkim kodeksom Agencije.
- (5) Vijeće Agencije će donijeti Etički kodeks, a članovi Vijeća Agencije i zaposlenici u Agenciji obavezni su se pridržavati istog.

## Član 7.

### **(Rad Vijeća Agencije)**

- (1) Vijeće Agencije radi u sjednicama i donosi poslovnik o svom radu.
- (2) Sjednice Vijeća Agencije saziva predsjedavajući Vijeća Agencije, a održavaju se najmanje jednom u 30 dana.
- (3) Sjednica Vijeća Agencije se održava i na zahtjev bilo kojeg člana Vijeća Agencije.
- (4) Svaki član Vijeća Agencije ima pravo predložiti razmatranje pojedinih pitanja na sjednicama Vijeća Agencije.

## Član 8.

### **(Odlučivanje Vijeća Agencije)**

- (1) U obavljanju poslova iz svoje nadležnosti Vijeće Agencije donosi odluke.
- (2) Odluke se objavljuju u "Službenom glasniku BiH".
- (3) Odluke Vijeća Agencije donose se na sjednicama kojim prisustvuju svi članovi Vijeća Agencije.
- (4) Vijeće Agencije odluke donosi koncenzusom.

## Član 9.

### **(Predsjedavajući Vijeća Agencije)**

- (1) Vijeće Agencije bira predsjedavajućeg Vijeća Agencije, u skladu sa članom 10. stav (4). tačka b) Zakona.
- (2) Predsjedavajući Vijeća Agencije:
  - a) potpisuje akte Agencije;
  - b) zastupa i predstavlja Agenciju pred drugim institucijama i reguliranim poštanskim operaterima;
  - c) saziva sjednice Vijeća Agencije i predsjedava istim; i
  - d) prati provođenje odluka Vijeća Agencije.
- (3) Predsjedavajući Vijeća Agencije može odrediti drugog člana Vijeća Agencije u slučaju privremene spriječenosti za obavljanje poslova predsjedavajućeg.

Član 10.

**(Stručni kolegij)**

Vijeće Agencije može osnovati Stručni kolegij na kojem će raspravljati o unaprijeđenju kvaliteta i efikasnosti rada, zauzimanju stavova i mišljenja o aktima o kojima odlučuje Vijeće Agencije.

Član 11.

**(Unutrašnja organizacija Agencije)**

Pravilnikom o unutrašnjoj organizaciji Agencije utvrđuju se organizacione jedinice Agencije, djelokrug i organizacija rada redovnih poslova i zadataka sa opisom poslova i zadataka, broj zaposlenih potreban za obavljanje poslova, prava, obaveze, odgovornost i ovlaštenje zaposlenih, vrstu i stepen stručne spreme i druge uvjete prijema u radni odnos, disciplinsku i materijalnu odgovornost zaposlenih, prijem pripravnika, ostvarivanje rada i javnosti rada i saradnju sa drugim institucijama u vršenju poslova iz nadležnosti Agencije, kao i druga pitanja neophodna za rad Agencije.

POGLAVLJE IV. FINANSIRANJE RADA AGENCIJE

Član 12.

**(Finansiranje i troškovi)**

Agencija se finansira u skladu sa zakonskim propisima kojima se uređuje njeno finansiranje.

POGLAVLJE V. JAVNOST RADA AGENCIJE

Član 13.

**(Finansijski plan i finansijski izvještaj)**

(1) Agencija usvaja i objavljuje godišnji finansijski plan i dostavlja ga Ministarstvu komunikacija i prometa BiH.

(2) Agencija poslije završetka svake poslovne godine objavljuje izvještaj o svom radu, uključujući i finansijski izvještaj i izvještaj nezavisnog revizora i dostavlja ga na razmatranje Vijeću ministara i Parlamentarnoj skupštini Bosne i Hercegovine.

Član 14.

**(Javnost u radu)**

(1) Agencija osigurava dostupnost svojih akata javnosti.

(2) Radi potpunijeg informiranja o svom radu, Agencija može objaviti posebne publikacije, časopise i biltene i izraditi web stranicu.

POGLAVLJE VI. ZAŠTITA POVJERLJIVIH INFORMACIJA

Član 15.

### **(Povjerljivost)**

(1) Pod povjerljivom informacijom smatra se dokument ili informacija koja, ukoliko se otkrije, može ugroziti interes ili integritet Agencije.

(2) Dostavljanje informacija sadržanih u povjerljivim dokumentima i informacijama Parlamentu Bosne i Hercegovine ili drugoj nadležnoj instituciji, putem izvještaja odobrenih od strane Vijeća Agencije, neće se smatrati otkrivanjem povjerljivih informacija.

Član 16.

### **(Poslovna tajna)**

Svi članovi Vijeća Agencije, zaposleni i saradnici Agencije moraju čuvati povjerljive informacije koje su im dostupne prilikom obavljanja dužnosti ili zadataka u Komisijama, u skladu sa propisima Agencije. Takve informacije smatraju se poslovnom tajnom.

Član 17.

### **(Zaštita povjerljivih informacija)**

Vijeće Agencije će donijeti propise koji su vezani za zaštitu povjerljivih informacija uspostavljajući procedure za definiranje povjerljivih informacija i zaštitu dokumenata i informacija koje su definirane kao povjerljive.

## POGLAVLJE VII. PROCEDURA ZA IZMJENE I DOPUNE STATUTA

Član 18.

### **(Izmjene i dopune)**

Izmjene i dopune Statuta može predložiti bilo koji član Vijeća Agencije.

Član 19.

### **(Način donošenja izmjena i dopuna)**

Izmjene i dopune ovog Statuta donose se na isti način kao i Statut Agencije.

## POGLAVLJE VIII. PRIJELAZNE I ZAVRŠNE ODREDBE

Član 20.

### **(Primjena odredbi)**

Prijedlog tumačenja pojedinih odredbi ovog Statuta u slučaju nejasnoća ili nesuglasica vezanih za njegovu primjenu utvrđuje Vijeće Agencije, a saglasnost daje Ministarstvo komunikacija i prometa Bosne i Hercegovine.

Član 21.

**(Opći akti)**

Vijeće Agencije donijeće opće akte u skladu sa ovim Statutom u roku od 6 (šest) mjeseci.

Član 22.

**(Stupanje na snagu i objavljivanje)**

Ovaj Statut stupa na snagu danom davanja saglasnosti Ministarstva komunikacija i prometa i objavit će se u "Službenom glasniku BiH".

---

Broj 01.- 5/07  
5. juna 2007. godine  
Sarajevo

---

Predsjedavajući  
Vijeća Agencije  
**Fikret Gačanović**, s. r.

---

Ministarstvo  
komunikacija i prometa  
Saglasnost broj 01-02-1-3640-3/07  
23. novembra 2007. godine  
Sarajevo

---

Ministar  
dr. **Božo Ljubić**, s. r.